

QR. 329. 14.

Z  
f  
7035

Christliche Leichpredigt / bey  
der Begrebnuß /

X 2121484

Des weilandt Ed-

len / Gestrengen vnd Ehrnvesten

Friderich Burchardt Zenge / Gräfflichen

Gleichischen Trosten zu Pyrmont / Welcher den

25. Aprilis, Anno Christi 1608. zwischen ein vnd

zwey vhr nachmittage zu Pyrmont selig im

H. Ern entschlaffen / vnd den 29. zur

Erden bestattet worden.

Gehalten in der Kirchen zu Desterff

Durch

Antonium Bochröder Hoffpre-

diger auff Pyrmont.

Gedruckt zu Lemgo / durch Conrad

Grothen Erben.

BIBLIOTHECA  
PONICKAVIANA

UNIVERSITÄTS-  
(BAALE)  
BIBLIOTHEK



Handwritten text, likely a title or heading, possibly in Latin or German, including the word "Cantabrigie".

Handwritten text, possibly a list or a series of entries, with some lines appearing to be separated by small symbols or markers.

Handwritten text, continuing the list or entries, with some lines appearing to be separated by small symbols or markers.

Handwritten text, continuing the list or entries, with some lines appearing to be separated by small symbols or markers.

Handwritten text, continuing the list or entries, with some lines appearing to be separated by small symbols or markers.

Handwritten text, continuing the list or entries, with some lines appearing to be separated by small symbols or markers.



Der Edlen vnd Eh-

rentugentsamen Frawen Cordula / ge-  
borne von Krembsdorff / Des weylande Edlen /  
Bestrengen vnd Ehrnvesten Friderich Durchhardt Zeng-  
ge / hinderlassene betrübte Wittiben.

Item /

Den Edlen / Bestrengen vnd Ehrnve-  
sten Krafft Melchior Zengen / Fürstlichen Säch-  
sischen Hoffjuncckern zu Eysenach.

Vnd

Wolff Diderich von Bolgstadt / Graff-  
lichem Gleichischen Forst vnd Jegermeister zue  
Ordruff / meinen großgünstigen Juncckern.

Gottes gnade vnd reichen erost sampt meinem andechti-  
gem Vatter vnser zuuorn.

**E**dle vnd Ehrentugentsame  
Fraw Tröstin / Auch Edle /  
Bestrenge vnd Ernveste groß-  
günstige Juncckern / Es saget der Kö-  
nigliche Prophet Daud im 119. Psalm  
A ij vnder

6. Der andern also: Wo dein wort nicht  
 mein trost gewest were / so were ich ver-  
 gangen in meinem Elendt. In diesem  
 schönem denckwürdigen Sprüchlein  
 weist der liebe David mit seinem eige-  
 nem Exempel / wie ein betrübtes / be-  
 kümmeretes vnd angefochtenes Hertz /  
 hülff / rath vnd trost suchen vnd finden  
 kan / Nemlich / im wort Gottes. Den  
 auffer dem wort Gottes ist kein rechter  
 bestendiger trost / wie wir solches sehen  
 an den hochweisen Heyden / welche /  
 weil sie das wort Gottes nicht gehabt /  
 in ihren Creutz vnd Elendt / auß ihrer  
 welt weißheit / kunst vnd geschicklichkeit  
 keinen rechtschaffenen Trost haben  
 schöpffen können / Cicero, welcher doch  
 sonst gar ein beredter / gelarter vnd für-  
 trefflicher Man gewesen / spricht: *Ego  
 omnibus tentatis nihil inuenio, in quo acquie-  
 scere possim.* Das ist / Ich habe alles  
 ver-

Versucht vnd für die handt genommen /  
aber ich finde nichts / darauff mein be-  
trübtes vnd bekümmertes Herz ruhen  
vnd sich zu friden geben kan. Im wort  
Gottes aber wirdt der rechte beständige  
Trost gefunden / Gottes wort ist das  
rechte Teucrion, Je lenger je lieber / sei-  
ne frucht ist süßer den Honig / vnd seine  
gabe den Honigseim. Syrach 24. Got-  
tes wort ist vnseres Herzen freude vnd  
trost. Jer. 15. Gottes wort ist / wie der  
alte Christliche lehrer *Basilus* sagt / eine  
köstliche / heylsame / wolberendte Apo-  
teken wider alle menzel / seuchen vnd  
gebrechen / dasselbige ist vnser frefftige  
bewerte / Himlische arzeney. Gleich  
wie das Himmelbrot allerley lust gab  
vnd eines idern schmack eben war was  
einer nur drauff machen wolte / nach,  
dem ihm eine lust ankam / so schmeckt  
es auch : Also ist Gottes wort gar ein

A in lieb,

Syr. 24.

Jer. 15

Basilus.

Sapi. 16.

Psal. 19.

liebliches Confect, welches vns allerley reichen trost / bestendige lust vnd freude in allerley noth vnd anligen mit theylet / dadurch wircket der H: Geist der rechte werckmeister in vns / Leben / Friede / Freude vnd Trost / da her sagt David im 19. Psalm / Das wort Gottes erquicket die Seel / erfreuet das Hertz / erleuchtet die Augen / ist köstlicher den Goldt vnd viel seines goldes.

Weil den E. T. vnd E. E. E. durch den tödtlichen abgang des weylandt Edlen / Bestrengen vnd Ernbesten Friedrich Burckhardt Zenge / ewers hertzlibsten Junckern vnd Ehegaten / Vater vnd Schwahern / schmerzlich betrübt vnd bekümmert worden / können die selbige nirgent besseren vnd frefftigern trost nehmen / als auß Gottes wort / welches vns lehret / daß die yenige / so im glauben auff Christum sterben / nimmer.

mermehr sterben / sondern ewiglich le-  
ben / daher sagt Christus Joh. 11. Ich  
bin die Auferstehung vnd das Leben /  
wer an mich gleubet / der wirdt leben /  
ob er gleich stürbe. Den der Christen  
todt ist nichts anders als ein lieblicher  
sanffter schlaff / auß welchem wir am  
jüngsten tage durch Christi stimm wer-  
den auffgewecket werden / Vnd ob wir  
wol vnserer verstorbenen mittler weil  
entrathen müssen / vnd ihrer gemein-  
schafft nicht können / wie zuuor / ge-  
brauchen : Jedoch wissen wir / wo sie  
sindt / Nemlich / in Christi handt / vn-  
uerlohren vnd auch vnuerdorben / nie-  
mandt soll sie auß der handt des Herrn  
reissen / Johan. 10. Darauff sihet auch  
Paulus in seiner Epistel an die Römer  
am 14. Cap. da er spricht: Vnser keiner  
lebet ihm selber / vnd keiner stirbt ihm  
selber / Leben wir so leben wir dem Her-  
ren /

Joha. 11.

Joha. 10.

Rom. 14.

ren / sterben wir / so sterben wir dem  
HERRN / Darumb wir leben oder ster-  
ben / so sindt wir des HERRN.

Apr. 4.

Ach wie wol ist vnsern verstorbenen  
Mithristen gescheen / sie sind von aller  
furcht vnd gefahr / mühe vnd arbeit  
dieses zeitlichen Lebens gantzlich erlö-  
set / daher stehet in der offenbarung Jo-  
hannis am 14. Cap. Selig sind die tod-  
ten / die in dem HERRN sterben von nun  
an. Ja der Geist spricht / das sie ruhen  
von ihrer arbeit / den ihre werck folgen  
ihnen nach. So verlieren wir auch die  
vnsern nicht / die vns lieb sindt / wenn  
sie durch den Todt von vns getrennet  
werden / welches zwar sehr schmerzet  
vnd wehe thut ( den was herzet das  
schmerzet ) sondern wir senden diesel-  
bige nur vorhin / Wollen / wils Gott /  
bald nachfolgen in ewiger freude vnd  
seligkeit bey einander bleyben. Derwe-  
gen

gen sollen wir das trauern / so viel im-  
mer möglich / messigen / vnd nicht trau-  
rig sein wie die Heyden / die keine Hoff-  
nung haben / 1. Thessal. 4. *Quod placet*  
*Deo, placeat etiam homini,* Das ist / was  
Gott gefelt / soll vns Menschen auch  
gefallen / sagt ein alter Kirchenlehrer /  
Der HErr hats beschlossen / wer wil  
endern / Esai. 14.

1. The. 4

Esai. 14

Damit nun E. T. vnd E E. E E.  
dieses trostes desto besser könne gebrau-  
chen / habe ich auff derselbigen begeren /  
die Leichpredigt / so bey dem Leichbe-  
gengnis Ewers in Gottruhenden herk-  
libsten Ehehern / vnd Vatter / gehalten  
worden / so gut sie mir der liebe Gott be-  
scheret / zu Papter gebracht / vnd wil  
E. T. vnd E E. E E. dieselbige hirmit  
Dediciren vnd zuschreiben / dienstlich  
vnd fleissig bittent / dieselbige wollen  
solche geringfügige arbeyt nicht anders

B den

den Christlich vnd wolgemeint / von  
mir annehmen. Der Gott alles trostes  
wölle E. T. vnd E E. E E. in diesem  
herbleidt vnd bekümmernis durch sei-  
nen heiligen Geist den höchsten Tröster  
in aller noth / stercken vnd erquicken.  
Demselbigen getrewen Gott vnd Vat-  
ter im Himmel sey E. T. vnd E E. E E.  
in seinem Allmechtigen schutz vnd  
trost trewlich befohlen. Datum  
Ostorff den 17. Junij  
Anno 1608.

E E. E E.

Dienstwilliger

Antonius Bochröder Hoff,  
prediger vff Pymont.

# Vermahnung zum

## Gebet.

**G**eliebte vnd Außgewählte im HERRN/  
Es hat der getrewe barmhertzige Gott/  
nach seinem Väterlichem Rath vnd  
willen/auß diesem betrübtem Jammer-  
thal / in die ewige freude vnd seligkeit / durch den  
zeitlichen natürlichen Todt / abgefodert / den Wen-  
landt Edlen / Bestrengen vnd Ernvesten Friderich  
Durehardte Zenge / Gräflichen Gleichischen Tro-  
sten vff Pyrmont / dessen verstorbenen Leichnam /  
wir auß Christlicher liebe vnd pflicht / das gleich  
anhero zu seinem Ruhebetlein vnd Schlaffemer-  
lein gegeben haben. Weil den durch diesen Todes-  
fall viel fromme Christliche hertzen betrübt wor-  
den / als wil ons nicht gebüren ohne lehr vnd trost  
vñ in einander zu scheiden. Damit aber solcher trost  
vnd lehr Götliches worts in vnsern Herten haß-  
ten müge / Wöllen wir Gott den Vatter aller gna-  
de vnd Barmhertzigkeit vmb hülff vnd beystandt  
seines heiligen Geistes hirtzu anruffen / vnd  
im warenglauben sprechen ein hei-  
liges Vatter vnser.

B ij

Text

# Text zur Gleichpre- digt / Psalm 90.

**U**nsere leben weret siebenzig Jahr /  
wens hoch kompt / so sindts achtzig  
Jahr / vnd wens köstlich gewesen ist /  
so ist's Mühe vnd Arbeit gewesen / den  
es fehret schnell dahin / als flögen wir  
dauon. Wer glaubts aber / das du so  
sehr zörnest? Vnd wer fürchtet sich für  
solchem deinem grim? Lehre vns be-  
dencken das wir sterben müssen / auff  
das wir flug werden.

## Erklärung des verlesenen Texts.

Exor-  
dium.

Gen 47.

**L**iebte vnd Außerköhlte im HERRN /  
Wir lesen im ersten Buch Mosis am  
47. Cap. von dem frommen vnd heili-  
gem Erkvatter Jacob / als er von sei-  
nem Sohn Joseph für den König Pharaonem ge-  
bracht / vnd von Pharaone gefragt worden / wie alt  
er sey / wie hoch sich doch die zeit seines alters er-  
strecke /

strecke. Hat er auß Geistreichem hertzen eine solche  
antwort geben : Die zeit meiner Walfart ist hun-  
dert vnd dreissig Jahr / wenig vnd böse ist die zeit  
meines lebens / vnd langet nicht an die zeit meiner  
Vätter in ihrer Walfart. In diesen schönen denck-  
würdigen Worten zeigt der Patriarch Jacob gar  
deutlich an / was vnser leben auff dieser Erden sey /  
Nemlich / nichts anders den eine stetige walfarth  
vnd Pilgramschafft / wir gehören hir nicht zu  
haus / Sondern sindt nur Gäste / Pilgram vnd  
Wandersleute / im Himmel haben wir das rechte  
Vatterlandt / da ist ein freudenreicher Standt.  
Daher sagt die Epistel an die Ebreer am 13. Cap.  
Wir haben hie keine bleybende stadt / Sondern die  
zukünfftige suchen wir. Der Königliche Prophet  
Dauid / welcher ein reicher vnd mechtiger Herr  
gewesen / erkennet sich für einen Frembling vnd  
Gast / im 119. Psalm sagt er : Ich bin ein Gast  
auff Erden. 1. Buch der Chro. am 30. Wir sindt  
Gäste vnd frembling vor dir / wie alle vnser Väter.  
Xenophon schreibet vom großmechtigen Köni-  
ge Cyro / das er in seinem Todtbette gesagt habe:  
Ich scheide auß dieser Welt nicht als aus einer  
Heymat oder stetigen Wohnung / Sondern als  
auß einem Wirtshause / den Gott hat vns diß le-  
ben geben nicht ewig zubewohnen / Sondern dar-  
ein als in eine Herberge eine zeitlang einzufehren.  
Jener Philosophus als er gefraget worden / Was

*Ebr. 13.*

*Ps. 119.  
1. Pa. 30.*

*Xenoph.*

B iij

der

Syr. 40.

der Mensch were / vnd was er für Geferten in die-  
sem leben hette? Hat er geantwortet / Der Mensch  
sey wie einer der vber Landt reysset / iß da / iß dort  
hin komme / seine Geferten aber weren / Hunger /  
Kummer / allerhandt vngemach / Creutz / Elendt  
vnd Anfechtung. So findt nun alle Menschen  
hohes vnd nidriges Standes / Reich vnd Arm /  
Jung vnd Alt / nur Pilgramgeste vnd Wanders-  
leute auff dieser Erden. Denn gleich wie einem  
Wandersmann allerley vnlust beyegnet / er muß  
fort im Regen / in Hitze / Frost / es gehet ihm man-  
cher saurer Windt vnter die Nasen / muß mancher  
Pfüßen die augen außretten / Leib vnd Leben wa-  
gen: Also gehet es auch mit vns Menschen in die-  
sem Jammerthal / da finden sich allerley Creutz /  
mühe / arbeit / trübsal vnd gefahrlichkeit. Vnd heist  
freylich wie Syrach plaget / am 40. Cap. Es ist ein  
elendt iemmerlich ding vmb aller Menschen leben  
von Mutterleib an / biß sie in die Erden begraben  
werden / d e vnser aller Mutter ist. Da ist immer  
sorge / Furcht / Hoffnung / vnd zu letzt der Todt / so  
wol bey dem der in hohen ehren sitzt / als bey dem  
geringstem auff Erden.

Ein Wandersman / wenn er gleich in die beste  
Herberge kompt / da man ihm gar gütlich thut /  
ihn wol tractiret / kan er doch nicht stets darinnen  
bleiben / Sondern muß immerdar fortreyßen / biß  
er ent-

er endlich an das orth kompt / dahin er begeret: Also ist es auch bewandt mit vns Menschen / Es ge-  
einem auff dieser Welt so wol als es immer wöl-  
le / so kans doch nicht ewig weren / er muß fort / die-  
se Herberge verlassen / vnd den weg aller Welt ge-  
hen. Weil der Gast in der Herberge ligt / ver-  
gönnet ihm der Wirt / Hauß vnd Hoff / Stuben /  
Kammer / Kannen / Schüssel / vnd dergleichen  
nach gelegenheit zugebrauchen / bricht er aber auff  
vnd zeucht dauon / so darff er solches nicht mitneh-  
men / Sondern muß es in der Herberge lassen / das  
es andere so nach ihm kommen auch brauchen mü-  
gen. Also gehet es auch mit vns Menschen / weil  
wir auff Erden leben / gönnet vns vnser lieber  
GOTT / vnd lest vns zu / das wir Hauß / Hoff /  
Ecker / Viehe / Geld vnd Gutt haben / vnd das  
jennige was in der Welt ist / brauchen / Wenn  
wir aber sterben / so können wirs nicht mitneh-  
men / wir müßens andern lassen / Gutt vnd  
Geld / ist der Welt / vnd bleybet der Welt / man  
legt es keinem zum Heupten / Daher sagt Paulus  
1. Timoth. 6. Wir haben nichts in die welt bracht /  
darumb offenbar ist es / wir werden auch nichts hi-  
naus bringen.

1. Tim. 6

Derwegen sollen wir vnser schantzē wol in acht  
nemen / vnser leben also anstellen / der zeitlichen gü-  
ter / ja alles / was in dieser welt ist / also gebrauchē /  
das wir es dermahl eins gedültig verlassen / mit  
frie.

Sum vñ  
einhalte  
der vor  
gelesene  
wort.

Proposi-  
tio seu  
partitio.

friede vnd freude ins ewige Himlische Vater-  
landt fahren können. Eben dieses lehren/vermah-  
nen vnd erinnern auch diese iho vorgelesene wort/  
darinnen Moses der Mann Gottes herzlich kla-  
get/das das Menschliche leben kurz/vnd der men-  
schen herligkeit auff dieser Erden nichts sey / weil  
sie mit so viel mühe vnd arbeit vermischet/ vnd ent-  
lich durch den zeitlichen Todt gantzlich auffgeho-  
ben wirdt: Vermahnet vns auch das wir solches  
so nicht in windt schlagen sollē/mie leider der meiste  
theyl der Menschen thut/ Sondern es fleissig be-  
trachten vnd zu herzen fassen / Gott vmb hülff  
vnd beystandt anruffen / das er das jenige / was  
wir von Natur nicht vermügen / durch seinen hei-  
ligen Geist in vns wirken vnd anzünden wolle.  
Diz ist die summa der vorgelesē wort. Damit wir  
nun auß diesen schönen worten etwas nütliches  
studiren/lernen vnd fassen mügē / wollen wir dar-  
ben zwey nochfolgende Pünctlein betrachten / 1.  
Wie Moses die kürze / müheseligkeit vnd flüch-  
tigkeit dieses zeitlichen lebens beschreibet. Zum  
andern/ Wie er klagt vber die sicherheit der Men-  
schen/vnd vns lehret/wie wir derselbigen bege-  
nen sollen. Der Allmechtige Gott ver-  
leihen wir zu seine gnade durch  
Christum / Amen.

Tom

## Vom Ersten.

**E**s ist lieben Christen/Moses der Man Gottes nicht allein im alten Testament / sondern auch im neuen jeder zeit hoch berümbt / vnd vor den fürnembsten Propheten gehalten worden / der mit sehr vielen vnd grossen wunderwerckē seine Lehr bestetiget / mit dem Gott von angesicht zu angesicht / wie ein Mann mit seinem Freunde / geredt. Vnd wenn wir Mosiss schriften ansehen / befinden wir in warheit so viel / daß wir ihm keinen vnter alten vnd neuen Scribenten gleich setzen / viel weniger vorziehen können. Denn was alle Historici wissen vnd schreiben / von dem anfang vnd schöpfung Himmels vnd Erden / der Menschen / Thier vnd aller Creaturen / so wol auch von den Henden / so sich in den ersten zwey tausent Jahren in der Welt zugetragen / das haben sie einig vnd allein auß Mose. In Mose finden wir das älste Euan-gelium / die erste Gnadenpredigt / auch allerley schöne Figuren vnd Bilder. In summa / Moses ist ein vnerschöpfliches Meer Göttlicher weisheit / ein solcher Scribent / den wir nimmermehr außstudiren können. Vnter Mosiss Schrifften wirdt nun auch gerechnet der 90. Psalm / welcher ist ein Gebett Mosiss des Manns Gottes / wie der Tittel klerlich außweiset. Denn do die Zsraeliten aus dem schweren Diensthauß Pharaonis in die Wüsten

¶

ge.

geföhret / mit vielem elendt / jammer vnd trübsal bes  
schweret würden / also das ihr viel drüber in vnges  
dult gerieten / vnd hinfillen. Hat Moses den 90.  
Psalm gemacht / vnd wil damit das Volk Gottes  
se vnd alle zeit erinnern / der schwachheit / gebrechen  
vnd jammers Menschliches geschlechts / weist  
auch auff den grundt / wo solches alles herkomme /  
zeigt an / wo wir hülff vnd trost suchen vnd finden  
sollen. Auß solchem des Moses gebet sindt nun ge  
nomen die vorgelesene wort / welche anfenglich also  
lauten: Unser leben weret siebentzig Jahr. Verba  
pauca sed magna, sagt Augustinus / Es sindt  
wenig wort / aber sie begreifen was wichtiges in  
sich. Unser leben weret siebentzig Jahr. Allhir sol  
len wir mit fleiß in acht nehmen / das Moses nicht  
saget / Unser leben weret tausent Jahr / viel n ein  
ger sagt er / Unser leben wehret biß an den jüngsten  
tag / wil vns damit erinnern / das wir gewißlich ein  
mahl vnd zwar nicht ober viel Jahr sterben / vnd  
dieses sichtbarliche Weltwesen verlassen müssen.  
Daher sagt Paulus Rom. 5. Der Todt ist zu al  
len Menschen durchgetrungen / dieweil sie alle ge  
sündigtet haben. Das ist / Weil alle Menschen vor  
Gott Sünder sindt / müssen sie auch alle sterben /  
Da kan niemandt dem Todt entrinnen / er sey so  
starck / schön / reich vnd mechtig / als er immer wöl  
le / es heist wie die Christliche Kirche singet:  
Einem Reichen hilfft doch nicht sein Gut /  
Dem

Rom. 5.

Dem jungen nicht sein stolzer Muth /  
Er muß aus diesem Meyen /  
Wenn einer hette die ganze Welt /  
Silber / Goldt / vnd alles Gelt /  
Noch muß er an den Reyen / etc.

Im ersten Buch Mosis am 5. Cap. lesen wir /  
wie alle die lieben Erzvatter vor der Sündfluth  
worden / etliche sindt über 900. Jar kommen / aber  
keiner hat 1000. Jahr erreicht. Wenn nun das al-  
ter der Patriarchen erzehlet wirdt / so folgen alle  
wege darauff diese wort / Vnd er starb.

Adam wardt 930. Jahr alt vnd starb. Methu-  
salah wardt 969. Jahr alt vnd starb. Dis ist / Ge-  
libte im Herrn / eben so viel / als wen Gott zu einem  
iden Christen sagte : Wenn du gleich viel hundert  
Jahr alt würdest / so mustu doch einmahl sterben /  
da wirdt nichts anders aus. Daß aber der heilli-  
ge Erzvatter Enoch lebendig in den Himmel ge-  
nommen worden / Genes. 5. Das auch der Pro-  
phet Elias nicht gestorben / Sondern in einem  
feyrigen Wagen mit feyrigen Rossen lebendig gen  
Himmel gefahren / 2. Reg. 2.

Das auch etliche Menschen vom Jüngsten  
tage ergriffen / vnd also dem Tode nicht vnterworf-  
fen sein / Sondern in einem augenblick sollen ver-  
wandelt werden.

¶

Die

Genes. 5.

Genes. 5.

2. Reg. 2.

1. Cor. 15

Dieses alles benimmt nichts der allgemeinen  
Regel/ welche sonst heist: Alle Menschen müssen  
sterben. Diese Regel bleybt bestendig vnd warhafft-  
tig/ biß der Jüngste tag des HERRN kompt. In  
summa / was bedarffs viel Disputirens oder be-  
weisens/ das wir sterben müssen? Wir sehen sol-  
ches teglich für augen/ man erregt immer einen nach  
dem andern dahin/ Hodie mihi, cras tibi, Heu-  
te ist's an mir/ Morgen an dir. Diß aber ist billich  
zu verwundern vnd hoch zu beklagen/ daß viel Leute  
gefunden werden/ die ihre rechnung auff viel Jahr  
machen/ leben in sicherheit dahin / vnd thun gleich  
als würden sie ewig in dieser Welt bleyben / da sie  
doch ihres lebens keinen tag/ Ja keine stunde gewiß  
sein. Ja wenn vnser leben gleich tausent Jahr we-  
rete/ so were es doch nichtig vnd gering/ den tausent  
Jahr sindt vor Gott / wie der tag der gestern ver-  
gangen ist. Nun hat aber kein Mensch imals tau-  
sent Jahr vollkömlich erreicht/ Ja vnter tausentem  
wirdt nicht einer hundert Jahr alt / ein Mensch  
stirbt natürlicher weise im siebenzigsten oder ach-  
zigsten Jahre / da nemen alle Krefte ab. Drum  
sagt Moses: Vnser leben weret siebenzig Jahr/  
wenns hoch kompt so sindt's achzig Jahr. Ach wie  
sehr hat sich die zeit verendert/ wie gewaltig ist das  
menschliche leben abgeschnitten vnd verkürzt wor-  
den? Vor der Sündfluth haben die lieben Aeltere  
er vber die 900. Jar gelebt / aber nach der Sünd-  
fluth

Ruth ist die zeit auß Gottes gerechtem zorn gewal-  
tig verfürzt worden / also / daß die Nachkommen  
kaum den achten theil des alters ihrer Vorfahren  
erlanget. Abraham hat gelebet 175. jar / Isaac 180.  
Jacob 174. Diese zeit hat von tage zu tage abgeno-  
men / biß es endlich auff siebenzig oder achzig Jahr  
kommen / welches auch schon zu Mosiſ zeit fast  
das höchste alter gewesen / wie viel tausent mensche  
sterben heutiges tages / die nicht siebenzig oder ach-  
zig Jahr alt sein / Ja die nicht das 50. 30. oder 20.  
Jahr ihres alters erreichen / viel sterben in der Wi-  
gen / viel in der Kindheit / viel in der Jugend / viel im  
menlichen alter / den die fälle sind seltsam vnd men-  
nigfaltig / es ist bald vmb einen Menschen gescheen /  
heut ist einer gesunde / morgen krank / vbermorgen  
tode / wie mancher Mensch stirbt plößlich dahin / ist  
in einer stundt gesunde vnd todt: Exempel findet  
man gnugsam: Chrysippus ein berühmter Mann  
ist vnter einem trunck süßes weins gestorben. Au-  
lius Manlius Torquatus ein fürtrefflicher  
Römer / da er in der Abendmahlzeit / von einem Ku-  
chen essen wolte / ist er alsbaldt todt blieben. Ana-  
creon ist an einem Weinbern körnlein ersticket.  
Appius Sauffæus ist enlendts todt blieben / da er  
nach dem bade ein frisch En außgesofft. Pittdarus  
der edle Poet / hat sich des abents frisch vnd ge-  
sunde zur ruhe gelegt / vnd ist des morgens todt ge-  
funden worden. Solche vnd dergleichen Exempel  
S iij bezen

Gene. 25

Gene. 35

Gen. 49.

bezeugen/wie kurz vnser leben auff Erden sey / wie  
schnel vnd vnuersehens vns der Todt vberfallen  
kan. Daher sagt Moses: Es fehret schnel dahin  
als flögen wir dauon. Gleich wie ein Vogel dahin  
fliegt / den verleuret man / ehe man sich vmbsiehet/  
das man nicht weiß wo er blieden: Eben ein solche  
gelegenheit hat es auch mit vnserm leben. Es ist  
vnser leben nicht allein kurz vnd flüchtig / Son-  
dern auch müheselig. Daher sagt Moses weiter in  
vorgelesenen Worten: Wens köstlich gewesen / so ist es  
mühe vnd arbeit gewesen. Da haben wirs / lieben  
Christen / was vnser leben sey / do es am besten ist /  
ist es mühe vnd arbeit. Daher vergleichet Job am  
7. Capit. vnser leben einem stethwerendem Kriege  
vnd streit / da man nicht ruhen noch schlaffen / noch  
die Wehr aus den Henden legen darff / Sondern in  
steter sorge / gefahr vnd kampff stehen muß: Er ver-  
gleichet auch vnser leben einem Tagelöhner / der sich  
gar müde vnd math arbeitet / vnd verlangen hat /  
das der Feyrabent komme.

Job. 7.

Psal. 84

David nennet vnser leben / im 84. Psalm / ein  
Zammerthal / darinnen es vns also gehet / daß wir  
mehr vrsach haben zu trauren den zu lachen. In  
summa / Zammer vnd noth / ist der Christen teglich  
Brodt. Ich wil nicht von Gottlosen / sondern nur  
von Christen reden. Wie wirdt ein Christ an seiner  
Seelen wohl auff tausent wege versucht / geplaget  
vnd angefochten? Wie manchen schweren kampff  
muß

muß er <sup>in</sup> seinem herzen vnd gewissen mit dem Teuf-  
fel/ Tode vnd der Sünde thun? wo Christus nicht  
das beste thete/so müsten wir gar verderben. Da-  
her singt die Christliche Kirche:

Ich lige im streit vnd widerstreb /  
Hilff O HErr Christ dem schwachen/  
An deiner gnad allein ich flebe /  
Du kanst mich stercker machen/etc.

Was anlangt den Leib / hilff Gott / wie ist der  
Mensch da mit allem was er hat / so vieler vnruhe/  
mühe / angst vnd arbeit vnterworffen. Da sein mehr  
als 300. Kranckheiten / die den Menschen können  
vberfallen / ohne die newe Kranckheiten / so auff die  
newen vnerhörte Sünden der welt / folgen. Beden-  
cket doch zu gleich mit / wie sorglich wirdt ein Kindt  
in Mutter leibe getragen? mit was grossen schmer-  
zen wirdt es auff die Welt geboren? Was kostet es  
für mühe / sorge vnd arbeit / ehe ein Mensch ein we-  
nig erzogen wirdt? Kompt nun der Mensch zu sei-  
nen Taren / wirt zu einem Ampt erfodert im Geist-  
lichen / Weltlichen oder Haußstande / da ist nichts  
den entel vnruhe / mühe vnd arbeit. Ist einer ein  
Prediger / wil er getrew vnd fleissig sein in seinem  
beruff / so findet er mühe vnd arbeit gnugsam. Vnd  
heist frenlich / wie Augustinus sagt : Episcopus  
non est nomen honoris. sed laboris. Ist einer  
ein Regent / wil er sorgfelig sein in der regierung / so  
hat er fürwar auch sein mühe vnd arbeit. Mancher  
muß

August.

muß in seinem Stande arbeiten / daß ihm nicht  
allein der schweiß vber die Nasen leufft / Sondern  
das auch alle seine Leibes kreffte drüber abnehmen  
vnd verschwinden. Hat man im Ehestandt keine  
Kinder / so ist es ein grosses Creutz / hat man aber  
Kinder / so hat man auch viel Jammer vnd elendes  
mit ihnen. Hat man ein stücklein Brots vnd zim-  
liche Nahrung / so hat man furcht / sorge vnd viel  
mißgönnen / hat man aber nichts / so ist es auch mü-  
he vnd arbeit. Baldt kompt Feters / baldt Was-  
fers noth / baldt kommen die Diebe vnd stelen et-  
nem das seine. Kompt das liebe alter heran / da ist  
eytel mühe / schwachheit vnd vnrube. In Summa /  
wir sehen vnser leben an in der Kindtheit / oder in  
seiner besten blüet / oder im höchsten alter / so ist es  
doch vnd bleibet war / was Moses hie saget: Wenn  
vnser leben hie köstlich gewesen ist / so ist es mühe vnd  
arbeit gewesen. Ob gleich ein Mensch auch in die-  
sem leben bisweilen ein fröliches stündlein hat / so  
ist es doch vnbestendig / es kan die lenge nicht weren /  
Creutz / Anfechtung / Mühe vnd Arbeit kompt ge-  
wiß / vnd zwar oft ehe man sich dessen versihet / es  
heist / die Welt ist voller pein / ein iglicher findet das  
seine. Sehet / diß meint Moses da er sagt: Vnser  
leben weret siebentzig Jahr / wenn es hoch kompt / so  
sindts achtzig Jahr / vnd wenn es köstlich gewesen ist /  
so ist es mühe vnd arbeit gewesen / den es sehr schnell  
dahin / als flöhen wir dauon.

Was

Was haben wir nun aus diesem ersten  
Pünctlein zu lernen vnd zubehalten?

*Ufus pri-  
mae par-  
tis.*

I.

**E**rstlich sollen wir hie betrachten / was doch  
die schuldt vnd vrsach sey / das der mensch / der  
die edelste Creatur vnd nach Gottes Eben-  
bildt erschaffen / so vielem Creutz vnd Elendt vnd  
entlich dem zeitlichen natürlichen Tode vnterworf-  
fen sein muß. Die hochweisen in der Heydenschafft /  
haben sich hoch darumb bekümmert / vnd die vrsach  
Menschliches jammers erforschen wollen / aber  
keiner hats mit seiner vernunft / kunst vnd ge-  
schicklichkeit recht getroffen. Moses der Man Got-  
tes setzt im 90. Psalm / daraus vnser vorgelesenes  
sprüchlein genommien / die rechte vrsach Menschli-  
cher trübseligkeit / vnd spricht : Das mache dein  
Zorn das wir so vergehen / vnd dein Grim das wir  
so plözlich dahin müssen. Ey / möcht jemandt sa-  
gen / Ist den Gott so grimmig vnd zörnig? Nein /  
Sondern Gott ist von Natur gnedig / gütig vnd  
barmherzig. Wenn er aber zörnig vnd grimmig  
wirdt / so bringen wir ihn dahin mit vnsern Sün-  
den vnd missethaten. Den er ist nicht ein Gott dem  
Gottlos wesen gefelt. Vnd wer böses thut / bleybet  
nicht für ihm / Psal. 5.

*Psal. 90*

*Psal. 5.*

Weil den die Sünde ein vrsach ist alles Jam-  
mers vnd Elendes / Wol an / so sollen wir vns mit  
höchstem fleiß für Sünden hüten.

D

Zum

2.

Zum andern/ Dienet vns diß erste Pünctlein von dem Elendt vnd Mühseligkeit dieses zeitlichen lebens darzu/daß wir nicht Hoffertig sein/vnd vns vnser gaben nicht oberheben / wie leider geschicht/ wenn einer weiß vnd gelert ist / oder hat groß Gelt vnd Gut / oder hat grosse gunst vnd ist hoch gehalten/hilff Gott/wie brüstet man sich/da fraget man nicht viel nach Gott vnd seinem wort/ man lest sich schier bedüncken / man darffe vnserg HErrn Gottes nicht/man legt sich auff wider den Negste/ denselbigen zu vnterdrücken / vnd weiß ihm nichtes zu willen. Da sollen wir bedencken/das diß alles mit einander vnbestendig sey/ es ist eben als wenn man eine Handt vmbwendet/ Gelt vnd Gut/Kunst vnd geschicklichkeit/grosse Digniteten vnd Wirden nehmen plözlich ein ende / wie die tegliche erfahrung genugsam bezeuget. Gleich wie nun ein Pfarw / der sonst ein hoffertiger Vogel ist vnd gewaltig stolzieret / wenn er seine schöne Federn außbreytet vnd beschawet/so baldt er aber seiner heßlichen Füße gewar wirdt / demütiget er sich vnd lest die Federn sincken. Also auch wir / wenn wir sehen vnd hören / was es mit dem Menschen für ein Ziemmerlich ding sey / wie baldt es vmb ihn geschehen/ solten wir vns beydes für Gott vnd den Menschen demütigen.

3.

Zum dritten/ Dienet vns diß erste Pünctlein  
dar.

Darzu/das wir ja vnser Datum auff diß vnbesten-  
dige kurz leben nicht setzen / wie leider der meiste  
theil der Menschen thut / die sich vmb Gelt vnd  
Gut/Ehr/Gewalt vnd Wollust dieses lebens also  
bemühen / gleich als wolten sie hie ewig bleyben/  
vergessen vnd verschercken drüber die ewigen Him-  
lischen güter. Ach das ist eine grosse thorheit / wir  
sollen aller zeitlichen Güter also gebrauchen / das  
wir stets gedenccken / wir werden nicht ewig hie blei-  
ben / all vnser gedanken sollen wir richten nach  
dem ewigen Himlischen Vaterlande. Wir sindt  
ja von dem frommen Gott nicht erschaffen / auch  
durch das theure Blut Ihesu Christi nicht erlöset /  
zu diesem zeitliche/vergenglichem vnd mühseligem/  
Sondern zu dem ewigem Leben. Darumb soll ja  
diß vnser höchste sorge sein / das wir nach solchem  
ewigen Vaterlandt / da vnser Bürgerschaft vnd  
rechte bleybende stadt vnd wohnung ist / vns sehne/  
vnd darnach trachten. Vnd sindt gewislich rechte  
Thoren / die ihr datum auff diß vergengliche leben  
setzen/denn sie bawen auff Sandt/trawen auff ein  
vngewisses vnd vnbestendiges; wer aber auff Gott  
den HERRN vnd auff seinen Sohn Ihesum Chri-  
stum/vnd auff sein wares Wort trawet / der ist ein  
kluger Mensch vnd hat wol gebawet.

Zum vierten/ Weil vnser leben so kurz vnd es so  
baldt vmb einen Menschen geschehen/ so solten wir

D ij

vnse

4.

Psal. 95.

Syr. 5.

Unsere busse vnd bekerung zu Gott nicht lang auff-  
schieben. Daher sage David Psal. 95. Heute / so  
ihr die stimm des HERRN höret / so verstocket euer  
Hertz nicht. Syrach 5. Verzeuch nicht dich zum  
Herrn zubekeren / vnd schieb es nicht von einem tag  
auff den andern. Derwegen sollen wir als balde  
ohne verzug unsere Sünde erkennen / Gott umb  
gnade bitten / vnser leben bessern / den Leuten guts  
thun / vnd also vnsern glauben bezeugen.

Entlich haben wir bey diesem ersten Punctlein /  
einen herlichen schönen Trost / dieweil nichts guts  
an diesem leben ist / man besche es in die lenge oder  
in die breyte / es ist vergenglich / entel mühe vnd ar-  
beyt. Wol an / so sollen wir vns wol zu frieden ge-  
ben / wenn vns Gott einmahl auß diesem Jammer-  
thal abfodert. Denn was verlieren wir / wenn  
wir selig sterben? Wir verlieren nichts guts / son-  
dern diß böse vnd vergengliche leben / vnd an dessel-  
bigen stath erlangen wir ein seliges / ewiges leben.  
Ich wil ein gleichniß geben: Wenn einer in einent  
alten bauwelligigen Hause zur Miete fesse / vnd mü-  
ste besorgen / das es ihm alle augenblick auff dem  
Kopff fiele / hette nichts darin zum besten / der wür-  
de es nicht für vbel auffnehmen / Sondern gar wol  
zu frieden sein / wenn einer keme vnd beföderte ihm  
in ein wolerbauetes Erbhaus / da alles vollauff /  
Küchen vnd Keller wolbestellet were: Diß thut  
Gott der HERR bey den glaubigen / wenn sie sterben /  
er brin

er bringet sie weg auß dieser batzfelligen Hütten /  
vnd bringet sie in das wolerbawete Erbhaus in  
Himmel / da kein Kreuz / keine Sorge / keine mühe  
vnd arbeit / keine Sünde vnd Todt / Sondern lieb-  
liches wesen vnd freude die fülle ist immer vnd  
ewiglich / Psal. 16. Derwegen sollen wirs mit gros-  
sem danck annehmen / wenn vns Gott auß diesem  
Zammerthal abfodert. Daher lesen wir von dem  
Abraham / Genes. 25. Cap. Daß er gestorben / alt  
vnd lebens sach / das ist / er hette dieses lebens ge-  
nug / als wenn ers hette mit Löffeln gessen / vnd war  
mit GOTT wol zu frieden / das er ihn einmahl auß  
diesem Zammerthal abfodert. Die in Christo ster-  
ben die kommen zur ruhe vnd zu frieden / wie Esaias  
redet. Vnd Johannes in seiner Offenbarung am  
14. saget: Sie ruhen von ihrer arbeit. Sie liegen  
da im Grabe als in ihrem Schlaffemmerlein vnd  
ruhen von aller mühe vnd arbeit / so sie die tag ihres  
lebens vber gehat vnd außgestanden haben. Daß  
hat wol gewußt vnd verstanden Babylas der hei-  
lige Märterer vnd fürtreffliche Bischoff zu An-  
tiochia / da er vnter dem Bluthunde Decio zur  
Marter geführet wurde / sang er mit freuden vnd  
heller stimm / auß dem 116. Psalm: Gib dich zur  
ruhe vnd zu frieden meine Seele / den der HERR  
thut dir guts. Freulich wol thut er den seinen guts /  
wenn er sie durch den Todt auß diesem Zammer-  
thal abfodert: Er trifft als den mit ihnen / Glauci

*Psal. 16.*

*Gene. 25.*

*Apo. 14.*

*Babylas*

*Psal. 116*

D iij

& Dio.

& Diomedis permutationem, gar einen guten tausch vnd gewünschten Wechsel/in dem er ihnen für mühe vnd arbeit / ruhe vnd friede schafft. Eben diesen Trost sollen wir vns auch zu nütz machen/ wenn Gott die vnsern auß diesem leben seliglich abfodert/ es ist wol war/ es thut wehe/ es gehet zu herzen/ wen der Todt zwen scheidet/ die einander lieb vnd werth gehabt / vnd mit trewen gemeinet/ aber wenn wirs recht bedencken / so dürfen wir nicht allzu sehr trauren / sondern können vns entschlich zu frieden geben. Denn was verlieren unsere verstorbene Nitchristen? Sie verlieren diß leben / da nichts guts anzuthun / das voll mühe vnd arbeit ist? Was erlangen sie? Ein besser vnd ein ewiges Leben/ sie sindt an einen solchem orth/ da ihnen wol ist / sie begeren nicht wiederumb in diß Leben. Hiemit sollen wir vns ober dem absterben vnserer Nitchristen trösten. Genug vom ersten.

### Vom andern Stuck.

**F**olget fürzlich das andere Püncklein / Da Moses ober die sicherheit der Menschen klaget / vnd lehret vns / Wie wir derselbigen begegnen sollen / seine wort lauten also: Wer glaubets aber / das du so sehr zürnest? Vnd wer fürchtet sich für solchem deinem Grim?

Wrtm? Ach lieber Gott/ wil er sagen/ob gleich die  
Menschen allenthalben mit noth / Jammer / vnd  
elendt vmbgeben sindt / vnd entlich sterben müssen :  
Dennoch fragt der meiste theyl nichts darnach/  
schlegst in windt / vnd lebet in grosser sicherheit da-  
hin. Ja Moses bekennet sein theyl mit / das er  
eben der sündlichen art vnd zu Fleischlicher sicher-  
heit geneigt sey. Damit nun solcher bösen vnarth  
bey ihm vnd andern gewehret werde / wendet er sich  
durch das Gebett zu Gott dem Allmechtigen / bit-  
tet / Gott wölle ihm vnd dem Volck diese sicher-  
heit vertreiben / vnd spricht : Lehr vns beden-  
cken / das wir sterben müssen / auff das  
wir klug werden. Das ist Allmechtiger ewi-  
ger Gott / gib du doch das mir nicht so sicher vnd  
verstocket sein / wie der größte hauff ist / Sondern  
vnsern Jammer vnd Elendt / darin wir stecken /  
wol betrachten vnd zu hertzen nehmen / das du von  
wegen der Sünde ober vns zürnest / disz leben ver-  
fürhest / vnd endlich abschneidest / damit wir nicht  
dahinfahren / wie das Viehe / sondern das wir vns  
als die klugen fürsehen / bey dir zu gnaden kommen /  
vnd also zu vnserm sterbstündlein vns recht vnd  
wol bereyten.

Wo.

Ufus se.  
sunda  
paris.

1.

## Wo zu dienet vnd nützet vns diß andere Püncklein.

**E**rstlich dienets vns darzu / daß wir stets ans  
ende gedenccken / vnd fleissig betrachten sollen /  
das wir nichts gewissers haben / als den todt /  
aber nichts vngewissers / als die zeit vnd stunde des  
todes. Kein Mensch ist für dem Tode gefreyet / er  
sey Reich oder Arm / Jung oder Alt / hohes vnd ni-  
driges Standes. Daher haben die alten gesagt:  
Were ich so schön als Absolon /  
Vnd so weiß als Salomon /  
Vnd hette des grossen Alexandri Reich /  
So were ich doch dem Tode gleich.

Syra. 7.

Diß sollen wir fleissig bedenccken / daher sagt Sy-  
rach Cap. 7. Lieber Mensch / was du thust / so be-  
dencke das ende / so wirstu nimmer vñels thun.

3.

Zum andern / Dienet vns diß Püncklein dar-  
zu / daß wir fein mercken die vrsach / warumb wir  
ans ende gedenccken sollen / Nemlich darumb / auff  
daß wir klug werden. Diß ist ein recht kluger  
Mensch / der fleissig vnd mit ernst bedenccket / das  
er sterben muß. Des macht kluge Leute vnd de-  
mütige hertzen / wenn einer stets ans ende gedenc-  
cket / daß er auch ein Mensch sey / vnd das ihn die  
Würme / so wol als andere Menschen fressen könn-  
nen. Wenn mancher bedechte / das ihm der Tode  
gewiß keme / so würde er seines Gottesdienst besser  
war

wartē / als er leider thut. Ach wie mancher lebet in  
Sünden vnd schanden wider das Gewissen? Ein  
solcher Mensch bedenckt nicht / das er sterben muß.  
Weil wir den von natur Weltliebende Herzen ha-  
ben / denen auch die gedechtnis des Todes bitter ist /  
sollen wir mit fleise embsig beten: HERR lehre vns  
bedencken / daß wir sterben müssen / auff das wir  
flüg werden.

Entlich dienet vns diß andere Pänclein darzu /  
daß wir lernen / wie wir an den Todt gedenccken / vnd  
vns auff vnser letztes ende schicken sollen. Es ist ein  
altes sprichwort: Offt rechnē behelt gute Freunde /  
das ist / wenn man offte mit einander abrechnet / so  
gibt es vnter guten Freunden / die mit einander zu  
handtieren haben / nicht leichtlich eine Irrung oder  
vneinigkeitt: Also sollen auch wir mit vnserm lieben  
Gott / alle tage / Morgens vnd Abents abrechnen /  
solcher gestalt / daß wir vnser Sünde erkennen /  
dieselbige vnserm Himlischen Vatter demütig be-  
kennen / vmb verzeihung vnd gnade bitten. Wir  
sollen auch vnsern lieben Heylandt Christum im  
glauben ergreifen / vns an ihm fest halten / so kan  
vns der Todt nicht schaden. Denn Christus sagt  
Johannis 11. Wer an mich gleubet / der wirt leben /  
ob er gleich stürbe. Vnsern glauben aber an Chri-  
stum / sollen wir stercken auß Gottes wort / mit dem  
gebrauch des heiligen Nachtmahls / vnd mit enffe-  
rigem gebett. Denn glauben sollen wir auch be-

E

wei

3.

1.

2.

Joh. 11.

3.

4.

weisen durch allerley Christliche vnd Gott wolge-  
fellige Wercke/ in vnserm Beruff trew vnd fleissig  
sein. Wer diß alles in acht nimpt/ vnd denselbigen  
folget/ der stirbt selig/ vnd ist wol hie gewesen. Diß  
ist auch das ander Pünctlein. Haben also E. L.  
angehöret zwey Stück. Erstlich / wie Moses die  
Kürze / mühseligkeit vnd flüchtigkeit dieses lebens  
beschreibet. Zum andern / Wie er klagt vber die  
sicherheit der Menschen / vnd lehret vns / wie wir  
dieselbigen begegnen sollen.

T E S T I M O N I U M N O.  
*bilis piè defuncti.*

**A**ls nun anlanget vnsern in Gott ru-  
henden Junckern vnd Herrn Trosten /  
dessen Leichnam wir skundt in sein Ru-  
hebettlein legen wollen/ wil ich nicht sa-  
gen von seinem Adlichem Geschlecht vnd herkom-  
men/ den solches gehöret hieher nicht / sondern nur  
allein diß melden / daraus wir schliessen vnd abne-  
men können/ daß Er ein frommer Christ gewesen /  
vnd nunmehr ein Kindt der ewigen seligkeit sey. Es  
ist vnser seliger Herr Trost in seiner Kindtheit von  
seinen Christlichen Eltern zu der heiligen Tauff be-  
fodert/ dadurch widergeboren / seinem Erlöser vnd  
Seligmacher einuerlihet / vnd in das Buch des  
Leb

Lebens eingeschrieben. Folgent ist er auch in warer  
Gottseligkeit vnd andern Christlichen Tugenden/  
wie man solches in seinem leben hat spüren können/  
aufferzogen worden. Es ist auch S. G. nach Wol-  
gatz am Fürstlichen Pomrischen Hoff kommen/da-  
selbst etliche Jahr blieben / hernach mit allem wil-  
len von dar geschieden / sich wider zu Weymar in  
Fürstliche Sächsische dienst begeben. Wie nun S.  
G. ihre Jahr erreicht / haben dieselbige zur Ehe ge-  
nommen / die weylandt Edle vnd Tugentsame Re-  
gina von Magdelung / mit solcher seiner seligen  
Frauen hat er im Ehestande gelebet 15. Jahr / vnd  
durch Gottes seggen neun Kinder mit ihr gezeuget /  
derer noch vier am leben sindt / so lang als Gott wil.  
In seinem Wittwenstande ist er vnserer Gnedigen  
Herrschaft zue Gleichen dienstwertig gewesen /  
biß er Anno 83. vor einen Trosten hieher beruffen/  
bestellet vnd angenommen worden. In solchem  
dienst ist S. G. durch Gottes schickung zur andern  
Ehe geschritten / vnd sich befreyet / an die Edle vnd  
Ehrentugentsamen Frauen Cordula / geborne  
von Kromsdorff / Nunmehr hochbetrübt Wittwe/  
mit derselbigen hat S. G. in einem friedtliebendem  
Christlichem Ehestandt gelebet 23. Jahr / vnd eine  
Tochter gezeuget / die noch bey gesunden Leibe / so  
lang als Gott wil / vorhanden ist / hat also des seli-  
gen Herrn Trost dienst allhie geweret ins 25. Jahr

E ij

Wie

Wie wol nun S. E. auch ein Sünder gewesen/  
wie wir alle sein/ auch seine Menschliche schwach-  
heit vnd gebrechen gehabt / welche er auch in der  
Beicht vnd in seinem teglichen gebett von hertzen  
bekennet / vnd Gott vmb vergebung angelanget:  
So hat er sich doch in seinem Ampt vnd Stande  
also verhalten/das vnser Gnedige Herrschafft zue  
Gleichen vnd Spiegelberg / daran ein gnediges  
gefallen getragen / ihn lieb vnd werth gehabt/ wie er  
den auch deshalb von allen Gottseligen vnd ver-  
stentigen Leuten / die sein aufrichtiges gemüth er-  
kant / Ze vnd allewege hoch geliebet vnd gelobet  
worden. Alle Vnterthanen in dieser Herrschafft  
geben neben mir/vnsern seligen Herrn Trosten das  
zeugnis / das er ein frommer/Gottfürchtiger/ver-  
stendiger / bescheidener vnd aufrichtiger Juncker  
gewesen / welcher viel böses gehindert / vnd viel  
guts gefördert. Ja/ ich bin das gewis/das in die-  
ser Christlichen versammlung viel seindt / die S. E.  
wenn es möglich were / auff dem Rücken widerho-  
leten. Neben seinem Ampt ist der selige Herr Trost  
auch ein sonderlicher Liebhaber Göttliches worts  
gewesen / hat die Predigten fleissig besucht / mit  
fleiß vnd andacht zugehöret/eine grosse lust vnd lie-  
be hat er getragen zue den Geistlichen Liedern / sich  
nicht gesehemet / dieselbige vor vnd nach der Pre-  
digt fleissig mit zusingen / denn was Gott vnd sei-  
ner Kirchen rühmlich ist / des soll sich niemande  
sche-

schemen. Es hat der S. Herr Trost auch diesen  
Christlichen gebrauch gehabt / das er nach gehalten-  
ner Predigt / entweder in der Kirchen / oder doch so  
balde er in sein Gemach kommen / sein Gebetbuch  
in die Handt genommen / dem lieben Gott für die  
anhörung Göttliches Worts gedancket / vnd ge-  
beten / das solches in seinem Herzen frucht vnd  
nutz bringen möchte. Er hat auch gerne von Gott  
vnd seinem Worte geredet / vnd wo er von seinen  
Ampts geschafften hat können abbrechen / hat er  
sich zu seiner Bibel / oder sonst zu einem Christli-  
chen Buch gefunden / vnd darin gelesen. Zur Ab-  
solution vnd zum heiligen Abendmahl hat sich der  
selige Herr Trost gebürlich gefunden / Wie er den  
vierzehnen tage vor seiner Kranckheit empfangen  
hat das heilige Abendmahl / als ein recht Viati-  
cum auff dieser Walfart / in das ewige Himlische  
Vatterlandt. Es ist vnser seliger Juncker alt ge-  
wesen ohngefehr acht vnd sechzig Jahr / welches in  
diesen letzten zeiten ein zimlich hohes alter ist / In  
seinem leben hat er auch mit der that erfahren /  
was wir ihkündt geprediget / den S. E. haben auch  
ihr Kreuz / Vnruhe / Anfechtung / Trübsal vnd  
Arbent gehabt / Vnd hette wol sagen mügen / da sein  
leben am besten gewesen / sey es Mühe vnd Arbent  
gewesen. In seiner Kranckheit hat sich der selige  
Herr Trost verhalten / wie einem Christen gebüret /  
Ob ihn gleich der liebe Gott vier Wochen auff  
dem

dem Siechbette gehalten / vnd zimlich hart angegriffen : So er doch solches alles mit grosser gedult erlitten / seinen willen in Gottes willen ergeben / hat also practiciret sein Symbolum, Alles Gut / was Gott thut. Denn Trost / der ihm von vns Prediger vorgesagt wordē / hat er mit begirigem hertzen angenommen / auch zuuerstehen geben / das er gedencke darben bestendig bisz an sein ende zuuerharren : Sonderlich hat er ihm fein beflandt gemacht die schönen Trostsprüche / Matthei am 11. Johan. 3. 1. Timoth. 1. 1. Johan. 1. vnd 2. mit solchen vnd dergleichen sprächen hat sich der selige Herr Trost getröstet / fleissig gebetet / Gott angeruffen / er wölle ihm geben / was ihm an Leib vnd Seel nütz vnd gut sey. Der getrewe Gott / welcher keinem mehr aufflegt / als er ertragen kan / hat dem Herrn Trosten entlich geholffen / vnd ist er / am nechst vergangenem Montag zwischen ein vnd zwey vhr nachmittage / ohne sonderliche vngewerbe selig im H E R R N entschlaffen. Seine Seel ist in der Handt des H E R R N / vnd keine Qual rühret sie an / der Leib soll ihundt in die Erde verscharret werden / das er allda von aller Mühe vnd Arbeit dieses zeitlichen lebens gar sanfft ruhe vnd schlaffe bisz an den Jüngsten tag / da wirdt der ewige Sohn Gottes ihn aufferwecken / Leib vnd Seel zusammen bringen / vnd mit allen Außertwchleten in die ewige Frewde einführen / da wöllen wir unsern  
Herrn

Herrn Trosten wider sehen / ewige Freundschaft  
vnd Brüderschaft mit ihm halten. Gott tröste  
vnter des die hochbetrübe Wittwe vnd Berwan-  
te / vnd verleyhe vns allen / daß wir auch Christlich  
leben / selig sterben / vnd am Jüngsten tage zur ewi-  
gen Freude aufferwecket werden. Das helffe E. L.  
vnd mir Gott Vatter / Sohn / heiliger Geist /  
die heilige Drenfaltigkeit hochgelobt  
in alle ewigkeit / Amen.



7035  
[Faint, mostly illegible text, possibly bleed-through from the reverse side of the page]

10A

m. 15



QR. 329/14.

Christ  
**De**  
 len/ Ge  
 Friderich  
 Gleichischen  
 25. Aprilis,  
 zwey vhr  
 H  
 Gehalt  
 Antonis  
 Gedruc



Z  
 7035

UNIVERSITÄTS- UND LANDESBIBLIOTHEK  
 (BAALE)

